

Inatsisartut aalajangiiffigisassaatur siunnersuutigineqarpoq Naalakkersuisut amerikamiut aallartitaqarfiat qinnuigisassagaat ikioqqulluta kalaallit timaasa panernikut Harvardip Universitetianiittut Peabody Katersugaasiviani Nunatsinnut uterteqqissallugit.

(Inatsisartunut ilaasortaq, Doris J. Jensen, Siumut)

Akissuteqaat

(Ilinniartitaanermut, Kultureqarnermut Ilageeqarnermullu Naalakkersuisoq)

Aappassaaneerneqarnera

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap siunnersuummik suliaqarneranut aamma isumaliutissiissutaanut Naalakkersuisut Ataatsimiititaliaq qutsavigaat. Naalakkersuisut naammagisimaarlugu maluginiarpaat Naalakkersuisut allannguutissatut siunnersuutaat akuerineqassasut ataatsimiititaliap isumaqatigiittup inassutigigaa.

Naalakkersuisut aammattaaq maluginiarpaat, allannguutissatut siunnersuut akuerineqassagaluarpat, Ataatsimiititaliap Naalakkersuisunut kajumissaarutigigaa, iliuusissanik pilersaarummi maannakkut toqqorsiviit pillugit Danmarkip Katersugaasivissuata nalunaarusiaaniittut pissutsit aamma innersuussutit sammineqartariaqartut. Ataatsimiititaliap Naalakkersuisunut aamma kajumissaarutigaa Kalaallit Nunatta Katersugaasiviani Allagaateqarfianilu toqqorsivinnik nutaanik pilersitsinissamut periarfissat misissorneqassasut aammalu suliami tassani kommunit peqataatinneqassasut.

Allannguutissatut siunnersuutip piviusunngortinneqarnerata aningaasaqarnikkut kingunerisassai ukiumut atorfirmut qaammatini marlunni atorfeqartitsinertut naleqassasut nalilerneqarpoq.

Kajumissaarutigineqartut Naalakkersuisut tusaatissatut tiguaat allannguutissatullu siunnersuutip akuerineqarnissaa inassutigalugu.